

憺園文集

憺園文集卷三十

墓誌

誥贈一品夫人王母徐氏墓誌銘

太夫人姓徐氏華亭人有明相國文貞公女孫錦衣衛指揮某之女太僕寺卿王公某之冢婦贈某官某之配今戶部尚書日藻之母也兩家門閥相對望而太夫人又幼有令德故太僕求婚于錦衣許之矣太僕之令山陰也孺人張歿贈公免喪乃娶太夫人歸而不逮事其姑事舅太僕公甚有禮春秋之事致其敬且致其哀曰新婦不幸不獲奉

祀先姑也贈公既貴遊負才名與夏考功陳黃門
諸君交好數戰藝失利鬱鬱不得志寢瘵踰年而
卒太僕公方官於朝負郭田不滿三頃纔給衣食
太夫人從父母家假貸以爲喪具既殮將殉焉水
漿不入口所親勸以身爲冢婦從死何如字孤乃
強進溢米勺水時尚書八歲弟沂七歲潯三歲一
女甫晬也文貞公當國日久錦衣承藉家門太夫
人習見服御之華膺聲勢之赫奕一旦布衣蔬食
稱未亡人篝火紡績拮据其家事而太僕公又捐
賓客會明季喪亂攜諸孤往來避兵遇盜囊篋盡

傾益窘甚母子焚焚相依然勵其子讀誦益嚴居
恒戚戚未嘗見齒迨尚書以興朝順治五年戊
子舉於鄉乙未成進士吉語聞太夫人酹酒告無
負於三者泣數行下賀者在室爲之沾巾他時或
訓誡子婦婢媵自述辛苦輒悲哀不自勝聞者
感動太夫人食其子之祿至叅藩乃棄養歷官
所至皆有書冒助以盡職或任官舍則早夜諄諄
曰吾及見爾祖之矯矯風節也繩其祖武可不勉
哉尚書之奉使還里值歲凶太夫人振廩爲糜以
食里之餓者里有下貧百餘家常月給斗米嫺黨

三才圖會卷之八
賙救不俟其請而後應也仲子沂早世太夫人慘
惻內結而口絕不言居二年寢疾遂不起時尚書
方需次在家依回左右竟至於大故服除起補少
叅防河中外十有八年洊登大司農乃疏請歸葬
蓋司農之在倚廬三卜葬日弗從乃權厝以俟至
是卜以今年二月啟贈公之兆而合葬焉食墨其墓
在春申浦南後岡之陽太夫人生於明萬歷癸卯
五月卒於康熙癸丑八月享年七十有一初封太宜
人累贈一品太夫人子三人長日藻乙未進士累官
工戶兩部尚書今子假在籍次沂太學生先太

夫人二年卒次湑由太學生考授知縣未仕卒女
一人適莫方伯公諱儼臯次子春芳現任徐州學
正孫三人于桓日藻出由貢生候補主事余女夫
也楨湑出丁卯舉人候補中書廷機湑出嗣沂後
由貢生初任內閣中書再任兵部職方司主事補
任車駕司主事乾學於太夫人族姑也而與尚書
又爲婚姻尚書之得請去國門以墓石尚虛爲屬
不敢辭乃敘而銘之銘曰

有邦之媛毓質相門嬪於太原實貴而貧旋遘閔
凶繼歷險屯劬勞顧復底於成人中道棄養風樹

悲辛雖烹五鼎莫報恩勤垂二十年忘家致身司
農計相旦暮秉鈞爲營窳窳哀悃抗陳詔許其
歸孝治惟惇遠邇會葬素車填闔國稱願然榮哀
并伸歸於其室木拱舊原日吉辰良利其子孫

翁鐵菴元配錢夫人墓誌銘

工部尚書常熟翁鐵菴以改葬其先人假歸也瀕
行以其室錢夫人狀來乞銘于余曰某旣得安厝
其先人將以三室祔于域兆惟先生賜之銘辭鐵
菴余京闈所錄士以古誼相勉往歲丙辰余妻北
來夫人與方舟而行阻風守閘輒與相見執禮甚

恭曰吾夫婦阨窮自分餒死徹座主何以有今日
自是往還起居餽遺無虛日說鐵菴窮時事往往
嗚咽不能出聲吾妻亦爲之泣下以此知其賢余
視鐵菴之狀及余聞之他者皆如是遂書以貽之
俾刻而藏焉夫人姓錢氏吳越武肅王二十五世
孫邑諸生謙亨之長女其母卽鐵菴從祖姑也鐵
菴少孤夫人逮事其姑趙夫人始鐵菴以家破不
能自存爲贅壻於錢其兄株與趙夫人寄居郊外
其弟楷亦依止他所夫人旣婚欲修廟見之禮乃
假鄰舍掃地以謁其姑歸而盡脫其簪珥以獻會

株以負課被繫趙夫人遂鬻以輸官株乃得釋鐵菴日一往城東省母夫人爲作果餌納懷中俾問其姑或治飲食使女婢隨以往鐵菴夜讀書雖不三號不止又恐驚其外舅姑常默記雖甚疲困不敢抗聲大欠夫人相對飲泣無一怨言既鐵菴補博士弟子負歲積館穀買屋城南以迎居母兄夫人典衣飾佐之始得盥漱寢膳成子婦禮三何趙夫人病遂不起夫人侍疾更喪咸應制度鐵菴哀毀嘔血不已夫人百計爲醫藥費僅乃得生會吳中大饑鐵菴家貧亦益甚與其夫人及二女一老

媼人日一溢米雜以糠覈幸不死其兄竟以貧死
負課甚多追呼及鐵菴鐵菴亦自以負課累誤吏
索甚急恐見辱欲雉經者數四夫人與其二女陰
守伺之一日聞叩門聲急鐵菴以爲吏也將自盡
夫人曰往時吏追呼不如是聲蓋察之乃與其女
從門隙窺見叩門者健兒中原人語音奔告鐵菴
鐵菴族父山愚公方爲洛中監司鐵菴曰此豈洛
中叔父書至耶猶恐吏給之出也自窺之果洛巾
人乃敢開門使入發書得百金且召之去以所得
百金輸官追呼稍緩乃得去其後追呼復急隸逮

鐵菴不獲腰絙若將縛夫人者夫人憤欲投水死
二女及鄰媪勸救得不死乃鬻所居值二十金盡
以輸官跳之窮鄉其地名沙堰者有顧氏傍水茅
舍三間倒壞無人居夫人欣然居之爨烟累日不
興也鐵菴去不敢復歸北走永平投其族人壬子
以永平衛籍薦京兆報者至入茅舍見其竈半沉水
底盎中僅數合儲歎息去丙辰鐵菴進士及第乃
迎夫人於京邸夫人念鐵菴未有子爲之買一妾
與偕來蓋鐵菴之出走已十六年至是始得伉儷
相守云居久之以疾南歸就醫稍愈復北上何

疾又作復南還還又稍愈丁卯二月忽嘔血數升
遂絕飲食至六月卒年五十有六鐵菴迄今尚未
有子夫人初抱楷之子甫生一月者以爲子旣娶
而夭有子名福生夫人所命也復取株之孫甫一
歲者名之曰壽孫以告於廟而以爲孫焉二女一
適太學生張夢鶴一適太學生瞿亮邦夫人先封
安人今以 恩誥贈夫人塋以某年月日銘曰
嗚呼禦窮也歷稔以爲常履豐也踰紀而遂亡其
荼苦也如此其食報也未償以敘哀也有述予之
銘也以藏

孫孺人墓誌銘

錢唐陸寅來京師閉城西蕭寺不出余私叩其所
以曰寅父隱君棄家遠遁徧求之東南不得今將
道膠萊來往海上成勞諸島間踪跡之冀有遇焉
與余泣別而去冒風濤觸颶魅號哭行求久之無
所遇而返歲丁卯與京闈薦值余主試南宮復得
之寅旣成進士不自喜也踰月過余請曰寅不孝
旣不獲侍養吾父而吾母孫孺人自父去後結憂
成癘歲在戊午竟捐不孝孤逝矣寅幸忝一第行
歸而謀窆焉若得夫子惠之銘則沒者無恨而家

隱君之志亦可藉以不泯余哀其意不忍辭按狀孺人姓孫氏家錢唐明嘉慶間有名都諫諱枝者其高祖也父文學公諱系康負才名與同郡吉水令陸公遊甚善文學早沒無嗣吉水長子名圻字麗京即隱君也以舊好故因求婚於孫氏孺人遂歸焉陸氏西陵名閼吉水公四子皆高才生矜尚名節縞帶之交徧於郡國而隱君尤好人倫鑒海內望之以爲君宗孺人力支中饋客之登堂修敬者流連信宿不計有二三盤飧必潔而是時王姑沈太孺人與姑表孺人皆在堂兩母寬嚴異性孺人

事之盡得其歡心於是人皆謂陸氏有婦卒已吉
水公沒未幾中原板蕩吳越間羣盜肆起隱君弟
行人殉節死隱君愈鬱鬱不聊生求爲僧不得則
竄身閩粵間孺人奉姑攜弱子女轉徙山村野聚
盜掠所過無虛日三匿荆榛蓬頭垢面然猶修婦
職甚謹歲時伏臘饋食無廢也已隱君思母歸資
醫給養孺人亦安之無何莊氏大獄起株連被逮
禍不測讞者拘繫其家籍產待報自督撫兩司下
咸有質問孺人每對訊則涕泣哀訴誓不令夫獨
寃死情辭慷慨感動左右獄當竟指庭前石曰脫

事急吾必死此先是海昌查舉人繼佐知禍萌芽具詞府縣先自列而并疏范貢士驥及隱君名緣此獄得解詔以所籍囚產賜三人直各千金隱君欲辭之度不可孺人曰今日非查孝廉不免盍舉此畀之隱君笑曰吾心也表孺人先獄未起卒隱君既除喪服而歎曰吾所以浮沉里閭幾蹈不測者以老母在故老母已歸土妻子可得行吾意耳遂瓢笠長往去不返顧孺人泣留之不得因遣僕入廬山遡大江上武當遍訪諸名山古刹至輒後之會湖南亂起僕遽返而孺人亦病矣孺人雖

爲名家婦陸氏仕宦素貧遭國家之難奔迸流離
殆無寧日初依親河渚其從弟治亦高士也走百
里訊之曲簿爲門顧視小兒女煢然饘粥不繼微
問曰姊亦有所憾乎曰惟恐不能成君子之志亦
何憾耶蓋不忍其去而又欲隱忍以遂其節者孺
人之用心良苦而其所遭亦可悲也已卒於康熙
十八年二月年六十有七子四繁祉邑諸生前沒
次寅戌辰進士次超夭皆孺人出次繁葛出後伯
氏側室徐出女四人三適士族一殤孫一望孫孫
女一繁葛幼嘗危病孺人懷抱與俱卧起者累月

沒前數日猶屬寅善撫之而召繁葛語之曰以兄
爲師無墮父業可也事嫠母金生死盡誠孝如子
職課寅力學而不見其成命也夫銘曰

襄陽妻子鹿車鄉里臯橋廡下尚平嫁娶彼逃有
托云胡不樂豈如夫子穢濁人間暫遊萬里潁水
箕山我心悲止曷云歸止雖則孔悲其心不違有
義與名孰爲是非一抔者土鬱鬱翠微華表之鶴
倘復來斯

王子和元配李氏墓誌銘

海豐王子和旣喪其嘉耦乃爲之述其行略乞銘

於其先人少宰公之門下士崑山徐乾學曰余少
遭閔凶三歲而先夫人見背甫成立而先少宰捐
賓客余體孱弱善病又性拙不耐周旋人所恃以
勉強支吾不至忽墜前人之緒者獨以吾妻李賢
且才實右相之也今又不幸棄余而即世矣吾妻
蓋亦幼而失母外舅鄴園公憐之始至余家事先
公夫人甚謹躬親勞勩以祇婦職先公謂夫人曰
婦賢又無母也宜女視之及先公之歿于京邸無
子姓之助比載喪還里啟先夫人兆合葬於西郊
凡附身附棺之物疎數有節豐約有程皆李佐吾以

勿之有悔糲醕脯腊不匱于藏箴管線續不去于
身而滋味淡泊衣裳澣漱怡怡然能使余忘其貧
且病也姑息之愛不以施於其子嚴聲厲色不以
及于其使令而嘉賓賢士之不鄙而相過從者曾
未闕歡燕贈問之儀也自年十六歸于余今十八
改歲矣於家未得享一日之逸于夫未得待一命
之榮于子未得受一日之養有父老矣勞于王事
捍封疆于二千里之外其生也不見數年於茲其
死也不得視其含窆而長已矣噫可悲也乾學昔
者嘗聞孺人之孝於少宰夫子矣乾學受知夫子

最深閒居侍坐語及家事曰冢婦李順視尊章猶已親也且自婦來而家事益治今子和之言爲不虛美矣是宜銘也孺人李氏武定州人今總督浙江兵部尚書都察院右副都御史鄴園公之女嫁海豐王氏故吏部左侍郎兼翰林院學士冰壺公之冢婦正三品蔭生候補七品京職王爾梅之妻子和者爾梅字也孺人以康熙十九年閏八月己酉卒距其生之歲三十有四年生男子子四人重光重熙重輝殤者一人女子子三人殤者一人以其卒之年十二月丁酉葬于王氏先墓之次銘曰

冀官惟父少宰惟舅媛李行淑嬪王德茂違侈去
矜鹽漱箕帚嘉耦曰妃字子能母壽止卅四胡不
永久悼內有述尚圖不朽泐之銘詩以慰吾友

王母邵氏墓誌銘

錢唐王生丹林貢入太學以績學力行名諸生中
余始在禮部例當磨勘天下貢士卷見生文心賞
之旣而介其宗人原來見恂恂乎質有其文也三
何以母喪奔歸余往唁之生哭踊甚戚稽顙而後
言曰丹林三年于茲念母每欲告歸省母數馳書
諭止冀丹林親師取友以有成也丹林乃不敢復

言歸矣何圖吾母之遽至于此也余聞其言而哀
之生既歸移書于原曰昔年爲先君子營宅兆不
契于龜穿壙及泉今改卜于先塋之右而以吾母
祔窆有日矣私心痛念不孝違親遠遊即於大故
罪不可贖欲乞崑山先生銘墓中石以不朽死者
即丹林旦暮死藉以瞑目子甚知我其代爲請倘
憐而賜我乎原又言曰母姚江著姓考雲橋公有
三女而皆賢母其季也逮事舅姑以孝聞事夫子
以順聞夫病侍姑疾如子夫死喪其舅如姑姑有
愛女早寡迎養於家撫孤甥如子撫庶子如已出

於婦德蓋已備也於原有諸母之道知之也稔其可徵乃爲之銘

太原賢母邵爰出嬪吉生氏甫十七越州于產錢唐卒戊辰之臘十一日距生壬戌八月廿六十七年中壽陟三子庶董出厥一伯臣仲章克自立季也經明充庭實挾策成均學有級庭堦堂序容與入騎馬朝出捧書泣跣奔冰血肌坼副母踰四十喪其匹厝壤啟封不食墨改築新宮先壠側已巳夏午即其室母行應銘備婦德銘以掩幽貞石刻

陳母馮安人墓誌銘

往者吳檢討志伊無恙時常示余以其所爲同里
陳仲震先生墓誌銘曰先生有能詩文聲於崇禎
壬午癸未間一時名士共相推挽交遊幾遍海內
自甲申後絕意功名事父母以孝聞與人交有恩
義於誌可徵也有軼事爲公道之仲震頭白乃執
親喪擗踊哭泣如孺子也吾郡喪車出城門門卒
橫索錢必厭所欲乃已見仲震年已老夫婦毀瘠
徒跣哀號感歎爲之揮涕與之錢不受且助執紼
以行閩中子女爲俘口渡江先生倡義贖之其家
頗以姓氏踪跡先生里居先生曰君誤耶此間無

此人也誌中以遺二事弗書爲憾余意中因有仲
震先生其人其後於一統志館與澹人高學士繙
閱天下郡邑所上志書見仲震姓名於孝義傳因
以前言徵之學士學士曰是其子吾姻也吾知之
匪直仲震廼其夫人實有齊德以偕隱凡仲震之
定省于二親之所者進盥授巾布席視其縣衾斂
簞五十餘年與夫人俱至其傾囊竭篋以賙拯人
于厄者夫人鬻簪珥之佐也他日西泠諸名士繫
槃之會仲震狎主齊盟夫人爲賦鄭之鷄鳴焉此
可以見古之君子自身刑家之效而亦正乎內者

之相成就然也會其子季方述其母夫人之行來
乞銘因敘之曰夫人姓馮氏父處士諱某某縣人
年十六歸陳氏奉養舅姑盡婦道夫婦相勸以爲
善至老不倦生男子子四人景方上虞縣生員季
方吏部候選從六品職幼方國子監生彥方候選
州同知女子子一人孫六人女孫三人其婚嫁皆
名族初澹人學士爲其長子擇配欲得有名德者
之家莫如陳者而兩家又皆自越徙杭也故季方
之女今適高氏先是景方幼方皆早世仲雯不勝
其哀以歿旣而少子彥方亦不祿丙寅秋夫人使

季方送女于京師明年春禮成未還而夫人以夏
六月卒于家距仲雲之卒八年矣享年七十有二
某年月日合於仲雲之兆銘曰

或野于耨或廡于春厥助惟賢中饋虔恭瀉水卿
耀馮城氏封潛德克配曷不肅雖有嚴內位恒物
率從言施其祉必亢其宗里人刻石視昔仲弓我
紀婦順貽美煒彤

竇太孺人墓誌銘

孺人姓李氏柘城人嫁同縣竇氏封翰林庶吉士
大任之妻庶吉士克勤之母生四男四女克勤之

弟曰振起甲子武科舉人曰克恭曰克讓有孫六
人曰容端容恂容肅容莊容遂容順女孫五人孺
人年五十有四康熙二十八年十一月己酉卒於
京師始孺人在家有女德既嬪于竇逮事王姑李
夫人君姑姚夫人王姑年已老孺人佐其姑奉侍
能得歡心既歿而佐治喪具盡禮哭泣盡哀姑甚
賢之曰吾所以無悔於事先姑者以有此婦也既
而寢疾病醫言不可治孺人夜半焚香告天籲增
其姑壽一紀願刲股以和藥劑倦而假寐若有神
撼之曰起起是其時已孺人驚起即引刀刲股下

肉一臠投湯液中刀無縷血濡創亦自合其姑不知也飲之病良已其後果十二年乃卒縣令上其事中丞爲旌其門孺人知書通孝經內則教其子皆自爲之授章句長而具資糧使遊學四方故克勤數過睢陽湯先生嵩陽耿先生同居講論得執友之益克勤旣官翰林迎其父母養京師孺人以素有疾弗果行今年秋始夫婦偕來就養邸舍未幾疾復作踰三月遂不起克勤將扶柩還里衰麻哭踊執其父封公之狀介同年生王原以請誌墓之文於余余於昨歲禮闈得克勤固以其言渾樸

有經術似質行之士已而果然今按狀蓋亦其母
德有以成就之也銘曰

嗚呼孝婦李孺人之墓百歲之後與其君子同之
寵章有加可改題也純行無加視此碑也

憺園文集卷第三十

憺園文集卷第三十一

神道碑銘

資政大夫兵部郎中加二級卞公神道碑

銘

資政大夫卞公既葬之三年其孤福保傳爾齊等以
余知公涕泣請書其事於墓道之石余誼無容辭
按狀公姓克爾德氏諱卞書庫父曰莽古代先世
科爾沁人後徙烏刺

太祖高皇帝龍興莽公率先慕義來歸

帝嘉其誠賜田給復遂家焉 盛京生子即公也

公貴贈祖若父如其官祖母索察喇氏母張佳氏
皆贈夫人公生八歲失怙無期功強近之親可援
託公能朝夕詣塾師讀書不倦及

世祖章皇帝定鼎燕京時年十五克官學諸生試
輒高等順治三年春授刑部筆帖式哈番明年進
他亦哈哈番諸條例明聽斷人罕能及十一年擢
通政使司副理事官時閩寇猖獗攻陷城邑據閩
安鎮烏龍江諸所簡親王率師討之公署參領
鼓厲部曲奮勇先登簿上其功居優等十五年
世祖章皇帝特計羣吏以公爲最給予誥命蓋

異數也十六年改副理事官爲左參議仍以公居之明年大軍收雲南明裔永明王出奔緬甸居阿瓦城公署參領從公艾興阿率師窮追獲之以歸緬甸地瀕西海山川阻深所過皆箐林絕壁緣崖上下軍士困饑渴觸瘴癘者甚衆踰年始至其地是役也公之功最著康熙五年

上念公前在刑部能平反疑獄仍命爲郎中掌廣西司印故事滿郎中秩正三品公自始仕至是凡五遷稔知文致之害每遇大獄必戒寮吏毋以私徇由是廷中益稱平歲餘調兵部屢掌武庫武選

職方印當是時三逆叛亂軍機秘密檄奏芻午公
身任勤勞殫心籌畫每留署不歸十四年摧稅天
津力革諸弊公素有知人明時總兵官趙良棟在
鎮公察其才亟稱之後果有功 康親王既平閩
省而漳泉海寇猶未靖飛章請益兵十七年公以
夸蘭大赴行間時海澄猶爲賊據廈門金門諸島
及鰲頭盤圍諸海口支黨蟠互將軍賴塔檄公率
四鎮兵分道擊之公先登陷陣宣布

朝廷威德剿撫並施賊敗走沿海悉平既而遊氛
西走潮之南澳惠之達濠往往屯聚公又從大將

軍追殲之粵西餘賊劉國柱等擁衆萬餘潰奔廣東之清遠聚于羅子岡公提兵剪滅在軍中凡六載勤勞備至名聞閩粵二十二年夏班師以積勞行至南昌卒同行大臣皆爲隕涕三軍痛哭至失聲公事母三十餘年曲盡色養雖午夜自公歸必躬候寒燠定省不懈喪葬一準于禮教子有家法命讀書以承先志生平謙謹篤實秉心恪慎遇事當機立斷應大疑大難倉卒若素定者方以大用期公而公逝矣公生于天聰四年卒于康熙二十二年享年五十有四配牛祐祿氏封夫人子四長

福保文林郎雲貴總督衙門八品筆帖式加一級
次傅爾齊文林郎太常寺贊禮郎次布爾彩次朱
蘭布俱監生女三長適二等阿達哈哈番穆爾嘉
次適工部右侍郎金世鑑次適內閣侍讀趙瑛孫
三達喇錫監生福保出帕帕爾彩出法復禮爾齊
出俱幼公于卒之年八月葬朝陽門外紅門村之
東原爰爲銘曰

奕奕卜公文武資蹴籍閩海凌滇池葉榆窮塞黑
水濯烏道百折天一絲提戈騰踐等剝施取彼餘
孽獮刈之毋俾遺蔓蕃而滋公昔通籍官法司民

自不寃非公誰三綰樞綬青銅螭口籌手畫多成
規中身而沒未竟施甄明公行徵此辭式貽後人
作求斯

誥封通奉大夫前侍衛兼管參領事石公
神道碑

誥封通奉大夫前侍衛兼管參領事關紫石公之
葬也宛平公既爲之誌銘而其仲子司農少卿復
請余文以揭諸其封曰誌納之幽宅於禮墓道得
有碑所以彰著先人之休德者先生其爲之辭其
意摯弗能謝也公諱綽里幔字曰關紫其先本蘇

萬人姓瓜爾佳氏高祖卜哈明成化間入覲授建
州左衛都指揮僉事曾祖阿爾松噶嘉靖朝入貢
襲父官至萬歷間公之祖石翰避仇廣寧家焉因
姓石氏有子三人曰國柱曰天柱曰廷柱我
太祖高皇帝之兵臨廣寧也天柱首先出迎國柱
廷柱以城獻

太祖高皇帝嘉焉賜廷柱所御名馬自是所至征
討皆從累立戰功官至少保兼太子太保鎮海大
將軍都統一等伯實生公兄弟七人而公爲之長
公以功臣子年十四即以佐領隨

太宗文皇帝經畧中原及王師入關西定秦晉
南平吳楚公皆有勲藏于冊府已而充侍衛事
世祖章皇帝以愼密敬勤承寵最篤晉秩參領
事

今上訓討軍實以備戎伍不敢暇逸蓋先後四十
年間歷事三朝靡有闕失以此人望歸焉太保
公初娶何夫人生公其後

文皇帝復以趙夫人賜之何夫人恒居別第既歿
而別爲域兆在通州之長營故公之葬從焉以慰
其母實遵公志也太保公以佐命勲賜田宅世職

累官祿入甚厚僮僕數百悉推以與諸弟論者難之其自比于漢之丁鴻薛包蓋公本以武達而醇謹質行以提其躬以教其後人必依於古之史傳所稱其素所嚮慕然也娶李氏誥贈淑人父諱某官西安將軍李氏遼左世家淑人生有女德事兩姑間克盡道享年六十前公三年卒公卒以康熙戊辰距生之年天命癸亥六十有六葬以明年正月癸酉李淑人祔子四人曰文晟廣東潮州府知府曰文桂丙辰進士官內閣學士擢總督倉場戶部侍郎請余文者也曰文彬廣西桂林府同知曰

文粹內廷供事官女五人孫七人孫女三人銘曰
石氏內徙于今三世高曾以上思皇克生原茶水
芑本根滋大自少保公開國承家七子惟一早世
其六皆貴今公之子四人又皆貴兄弟羣從列爵
五等姻連帝室朱輪華轂甲第相望家門之盛
時謂無雙而孝友忠順不驕不溢侍郎用儒學侍
帷幄有年遂參與密勿初少保自以身本滿州
願同滿州精兵効力

文皇帝命爲精兵額真後又命爲總領漢軍都
統於時漢軍八旗皆統焉迄今四十餘年本旗都

統屢更矣然無以易石氏者皆異數也侍郎在內閣時與其諸父內大臣和碩額駙自陳家世

上命還籍蘇萬不復繫于漢軍其寵異石氏可謂至矣去年秋扈從羽獵還拜黃羊野豕之賜公曰吾父子其何敢專君之惠其熟而薦之于廟徵賓客以餽之自古人臣蒙優渥而致其謙恭者于公父子見之矣其保世亢宗豈可量也豐碑爰樹以張余文尚其垂于永永焉

通議大夫一等侍衛進士納喇君神道碑
文

侍衛納喇君容若之既葬太傅公復泣而謂余曰
吾子之喪君既銘而掩諸幽矣余猶懼吾子之名
傳之弗遠也揭而表諸道庶其不磨然非君無與
屬者余固辭不可在昔蔡中郎爲人作志銘復爲
之廟碑者不一而足韓退之於王常侍弘中厚也
既志其墓又爲其隧道之碑情至無已也況余於
容若師弟誼尤篤是於法爲得碑於古爲無戾乃
更撰次其辭以復於太傅惟納喇氏舊著姓爲金
三十一姓之一望載圖史代產英雋君始祖諱星
懇達爾漢據有葉赫之地二百餘年中國所謂北

關者也數傳至高祖考諱養汲弩曾祖考諱金台
什曾祖考女弟作嬪

太祖高皇帝實生

太宗文皇帝而葉赫附中國當國家之興東事方
殷甘與俱燼

太宗憫焉乃厚植我宗俾續其世祀以及其次子
諱倪迓韓者則太傅之父而君之祖考也太傅娶
覺羅氏一品夫人生君于京師鍾靈儲祉既豐且
固君自韶齡性異恒兒背諷經史常若夙習十七
補諸生貢太學有聲十八登賢書十九舉禮部試

越三年

廷對數事析理諳熟出老宿儒上結字端勁合古法諸公嗟歎

天子用嘉成二甲進士未幾授以三等侍衛之職蓋欲置諸左右成就其器而用之而

上所巡幸南北數千里外登岱幸魯君常佩刀韉隨從虔恭祇栗每導行在

上前騎前却視恒不失尺寸遇事勞苦必以身先不避艱險退縮

上心憐之其前後賚予重疊視他侍衛特過渥已

進一等侍衛值 萬壽節

上親御筆書唐賈至早朝詩賜之後月餘令賦詩獻又令譯 御製松賦皆稱善久之然君自以蒙恩侍從無所展效輒欲得一官自試會

上亦有意將大用之人皆爲君喜忽以去年五月晦得寒疾卒卒之日人皆哀君而又以才不竟用死爲君深惜云君自少無子弟過天性孝友黎明起過太傅夫人所問安否朝退復然友愛二幼弟與之嬉遊同其嗜好怡怡庭闈間日以至夜暇則埽地讀書執友四五人考訂經史談說古今吟咏

繼作精工樂府時謂遠軼秦柳所刻飲水側帽詞
傳寫遍於村校郵壁海內文士競所摹倣然君不
以爲意客來上謁非其願交屏不肯一見尤不喜
接軟熟人所相知必款款吐心腑倒困囊與爲酬
酢不厭或問以世事則不荅閭雜以他語人謂其
慎密不知其襟懷雅曠固如是也當君始得疾

上命醫數輩來及卒

上在行宮聞之震悼後梭龍諸羌降命宮使就几
筵哭告之以君前年奉使功故君有文武才每從
獵射鳥獸必命中卒有成功於西方亦不爲無所

表見沒時年僅三十一余既序而又系之以辭曰
綿綿祚氏著于上京巍巍封國葉赫是營惟葉赫
之祀施于孫子既絕復完

天子之恩篤生相國補袞是職蓄久而豐發爲文
章宜其黼黻爲

帝衣裳

帝謂汝才爰寘左右出入陪從刀韃筆弭匪朝伊
夕自

天子所亦文亦武唯

天子是使生於膏腴不有厥家被服儒士古也吾

徒何才之盛而德之靜我勒其封誰曰不永

資政大夫刑部尚書謚敏果魏公神道碑

刑部尚書魏敏果公之葬在某原有司以

天子命襄其事於是 諭祭有碑而太宰澤州陳

公爲之誌銘康熙二十八年夏五月崑山徐乾學
復刻其墓碑曰蔚州魏氏其先鳳陽人明永樂初
從軍有功以明威將軍隨代王之國大同世襲大
同衛指揮使其後支子遷蔚州累代隱居行義有
諱宦者爲儒官尤爲鄉里所推公之祖考諱九經
考諱卿爲新城主簿皆贈如公官祖妣劉氏妣蔣

氏李氏皆贈夫人公李出也公諱象樞字環溪又號庸齋少讀書日誦數千言嚴重無子弟之過壬午舉于鄉偕計吏入都既至聞新城病奔歸遂遭大故時寇氛方熾士大夫爲所得輒被汙公艱難喪紀奉毋竄匿山谷得免

世祖皇帝龍興遼水入關定鼎丙戌開科公中進士選庶吉士館試賦詩有云上溯羲與軒而及濂洛澤慷慨天人期區區非所畫館師重之明年改授刑科給事中尋轉工科右給事中刑科左給事中時

世祖皇帝初親政公所條奏彈劾凡二十餘上最
後請聖躬慎起居一疏詞逼輔臣大略言

聖政維新機務孔多中外想望治平非同昔日如
皇上近巡京畿輔臣當陪侍法從以盡啓沃之忠
儻遠有所幸亦宜諫止 鑾輿以副保傅之責人
謂公獲罪且不測卒奉 俞旨又因災變陳言則

謂天地之變乃人事反常所致語侵權貴尤亟下
部院科道議之左給事例不與議公固以請許之
公與諸臣抗爭是非在廷爲之側目卒無以折公
也已丑分校禮闈陞吏科都給事中曾大計鎖廳

閱冊令兵馬司晝夜周廬巡徼一時凜凜復上四
疏皆言計典其一以爲糾拾之舊制當復而言官
不宜反坐疏下所司確議遂著爲令又言言官進
言不實第宜以考功法處分不可加以罪譴闕敢
言之氣督撫會推宜核事實勿徇虛名又恭陳四
款以佐

聖主勤民大政詳陳民命民情民食民困之大端
皆報可會溧陽得罪坐言官不先事發六科之長
皆斥公隨例降補詹事府主簿累陞光祿寺丞己
亥得請終養家居講求理學以躬行實踐深造自

得爲宗丁李夫人憂喪葬悉準古禮壬子服除益
都馮公方入閣特疏薦公清能矯俗才堪辦事

上即召公公以疾辭再召乃趨朝有旨以御史

用八月授貴州道監察御史滿歲內陞京卿仍管
御史事公方嚴爲中外所憚四方餽遺無至門者
公自先朝告歸十餘年起自田間入見

今上出謂所知曰堯舜繼世臣敢不盡其愚忠其
所言大要以謂方今俗尚奢靡人鮮廉讓實政治
之所宜先要以制度數核名實杜欺罔定民志盡

臣職

上皆以公言爲是是歲冬十二月擢都察院左僉都御史明年二月拜順天府府尹四月除大理寺卿七月陞戶部右侍郎十一月轉左侍郎一歲五遷在戶部方西南用兵有籌餉三疏其略以爲杜浮冒防侵漁清賦稅生財足食之正經也

上因命公同侍郎班公廸清查部庫八閱月而事竣

上嘉悅之戊午陞都察院左都御史公曰憲府任重非僅言責勉爲

皇上風勵百司使大法小廉足我願矣首疏申明

憲綱十事言國家之根本在百姓百姓之安危在
督撫願諸臣爲百姓留膏血爲國家培元氣臣
不敢不爲朝廷正紀綱爲臣子勵名節特旨謂
切中時弊立見施行舉廉介知縣陸龍其復其官
劾貪酷知州曹廷俞置諸法中外肅然九月與侍
郎孫公光祀學士陳公廷敬磨勘順天試卷因條
陳科場八弊嚴立關防之法復條學政十弊舉學
臣賢者勞之辨鄙嘉參劣者盧元培程汝璞士論
快之己未春二月內殿奏對畢

上命翰林張英高士奇捧御書唐詩一卷清慎

勤格物大字各一幅 賜公曰

上以爾居官克稱此三言奏事剴切詳明不負職掌故有此賜他日 賜紫貂披領

上諭公今年暫著明年別製為卿換之公掌憲未滿歲有刑部尚書之命上疏言當貪風日長吏治不清大吏因循小民困苦之際仰見

皇上宵旰焦勞于上臣不計身家不避嫌怨奉

朝廷之法與海內臣工共相遵守內而科道外而督撫參劾之疏屢達 御覽已有澄清之機臣職風紀夙夜兢兢不敢自安昔漢臣汲黯自請為中

郎補過拾遺臣亦請辭司寇留御史臺

上可其奏遂加刑部尚書留任總憲于是方上疏糾叅司官劉源溺職撫臣某即日京師地大震公與副都御史施公維翰入奏曰地臣道也臣失其職地爲之不寧臣不能肅風紀以脩職業請先罪臣以回天變

上即召公入內殿公伏地涕泣請屏左右語移時是時用事大臣爲之股栗然公之語近侍皆莫得聞施公迎于後左門見公淚流頰未乾也是日公與施宿署中語施云今民生困苦已極而大臣

之家日益富饒皆地方官吏諂媚上司朘削百姓
督撫司道轉餽送在京大臣以天地有限物力民
生易竭脂膏盡歸貪吏私橐小民愁苦之氣上干
天和致召水旱日食星變地震泉涌之異又會推
選擇徇私不公行間將帥復無紀律蠲免錢糧災
黎不沾實惠刑官鬻獄豪右罔利等威蕩然貴賤
倒置皆為可憂施公曰公何不極言之公曰

聖明燭照何待吾言吾儕負國萬死不足塞辜明
日

上以六條宣廷臣集議大略如公指于是朝士或

謂出于公造膝所請公之密友與子弟究不知公所陳何語也公常言大臣之誼在以人事君郝中丞浴起于徙所公所舉也其遵 諭舉廉一疏舉侍郎以下有清望者十人

上次第皆用之庚申復補刑部尚書公持論以爲司寇執法之官也書言士制百姓于刑之中又言茲用不犯于有司犯者固不可以宥而法固不可以骫也論者乃謂以縱姦爲寬大非所敢知若乃法外之矜全乃

主上如天之德亦非臣下之所可市恩也公立心

仁恕獨當官而行其言之嚴正如此辛酉扈從謁
孝陵一慟幾絕賦詩至哀明年奉命同少宰科
公爾坤巡察畿輔公以特典祇畏夙夜單騎案
行墨吏豪家聞風斂戢爲除泰甚者若而人還報
甚當

上意公老年馳驅登頓所至案牘填委積勞成疾
一日

上見其羸瘦垂問賜以參膏一器人參二斤公
逾感激疾甚欲引去而口不忍言也甲子春奏事
乾清門暈踣於地扶歸即日疏乞骸骨

上慰留乃復力疾視事子弟勸邸舍少休公曰吾
耽逸一日罪人待讞者增一日苦矣八月具疏再
請

上惜其去以詞甚迫許之令馳驛還里諭以三
觀乃行始入賜以御廚珍饌令內臣視公食多
少再入賜茶再入賜御筆寒松堂匾額古北
口詩公歸因自號寒松老人云去國之日公卿祖
餞相與感歎以爲公清勁之節始終不撓固不愧
斯稱而

天子之知公亦可謂至矣公官至尚書門庭蕭寂

皮閣有書數百卷無異秀才時所增惟 綸誥宸
章及諫草一囊而已歸後四年乃卒於家丁卯七
月晦日也壽七十有一

天子覽遺疏爲之震悼典禮有加親定謚曰敏果
生平所著書甚多晚皆刪去存十之三合以奏議
若干卷名曰寒松堂全集元配李氏 誥封夫人
側室劉氏樊氏子四人學誠康熙二十一年進士
內閣辦事中書舍人學謙學謚邑諸生學訥尚幼
女三人銘曰

嗚呼魏公躬行君子 本朝以來諤諤一士彼其

躡嚅所畏一死公之盡言亦少戇矣實惟中孚非以掠美公忤于人人諒公只寒松晚節徜徉田里秀才家風尚書門第非余頌公公自云爾

工部尚書湯公神道碑

工部尚書睢陽湯公卒於位其孤以其喪歸葬之於某原明年以官世治行來請碑銘余不敢辭爰按公行狀而以余所立朝親見聞者備書銘之石俾揭於墓道序曰公諱斌字孔伯號荆峴一號潛菴順治五年舉於鄉次年會試中式又三年成進士改弘文院庶吉士邸舍不避風雨常宴坐讀書

不妄有通謁給事中蔚州魏公象樞吏部湯陰王公伯勉皆以清節名於時每過門輒攬轡徘徊歎息乃去甲午授國史院檢討時議脩明史上言宜依宋遼金元史例錄南渡後死事諸臣執政詫其言疏上夜半傳旨召至南苑人皆爲公懼然

世祖皇帝顧與溫語移時不以爲罪也乙未詔選翰林出爲監司公得潼關道副使是時黔師屯成都漢中經略兵屯湖南關中征發四至民逃匿十二三公下車約束每大軍至使人逆之境外無得入城總兵陳德之調湖南也至關欲留公謂二

萬人坐食於此勢必不支然須車載送不可強遣也於是陳檄車五千兩騎報曰陳將軍實用車二千其餘待折鏑以行公潛遣人僦車二千而令民匿車河下還報車少將軍乃謂公曰我自僦車盡畀我錢乎公曰固善顧必以人量車每車坐幾人使民知其不足而補之陳遽傳令軍中公乃出坐關門上揮士以次升車滿十輛即遣出關而河下車皆集夜漏盡四鼓悉出關無一人留者因設祖道關門外請將軍出將軍聞鼓聲大驚欲追還軍士公曰吾民駕牛裹糧十餘日一散不可復聚且

軍已出關不得入也遂倉皇去至洛陽留匝月軍
變焚殺上聞而關城以公故得宴然無事未幾流
民歸者數千戶歲旱無麥而春夏兵餉例支麥麥
價浮於穀公請發倉穀以代軍帥以爲若是兵且
變督撫徵麥益急公曰吾民乏食將棄爲餓殍公
憂兵變獨不憂民變乎即發倉穀與兵約今歲無
麥食此明年將補支若麥而若以穀償官皆喜曰
願如今於是關西數千里麥征悉停兵民賴之公
莅事精敏訟無留獄環境五十里聽質者皆不齎
宿糧從鄉士大夫咨民疾苦罷行之或有以私干

者見公輒縮胸不得發常行勘荒遇雨止大樹下
民朱欄其樹時人以比之甘棠云轉嶺北道參政
轄贛南二府甫三日清積案八百餘李玉廷者明
舊將以所部萬人入山爲盜公以書約降之未及
期七日而海寇犯江寧公策玉廷必變計夜馳至
南安設守畢而寇果至見有備逃去隨請於制府
用將士分屯要害五六處誠令固守毋妄動玉廷
所向與兵遇遂就擒其黨亦解散公持身清潔所
至欲爲地方興利除弊其志甚銳其才足以濟之
而一終之於至誠故上官雖時有所牴牾而終釋

不疑以有成功自潼關移任僅攜僕二人往返八千里既定大亂念封中憲公病甚即謀歸省督撫惜之例外官予告非特薦不得起公故有異母弟甫六歲督撫欲令權宜以終養請公曰奈何以此欺吾君也且謂無兄弟而歸吾父必不樂竟以病告罷年纔三十三云初明末寇陷睢陽公母趙恭人以節死順治間始得旌公之歸也日侍中憲公及軒恭人色養備至而爲趙恭人建祠于所居西偏每朔望謁家廟畢必至祠展拜獻歆里人私識其來時刻先後二十年未嘗少差丁中憲憂服闋

造蘇門孫徵君門請受業與同志爲志學會講求
玩索所養日充粹官長稀見其面有同年任方伯
者見郡守問公近狀守對言實未聞有此人方伯
益嗟歎不已

今上戊午詔舉博學鴻儒司寇魏公以公名上試
補翰林院侍講同纂脩明史辛酉充日講起居注
官轉侍讀典試浙江壬戌充明史總裁次年命直
講筵纂脩兩朝聖訓公每日是輒正襟端坐潛
思經義比入講敷陳詳切務以誠意動

上聽歷左右庶子擢內閣學士兼禮部侍郎居四

月會江寧巡撫缺

上命公往陞辭 諭以朕非忍出卿于外顧江南
風俗奢靡訟獄繇夥以卿耐清苦特令往撫之冀
有所變革因賜鞍馬一綵緞十白金五百兩比行
又入見

上徹御饌賜之復賜

御書三軸曰今當遠離展

此如對朕也時

上將南巡急抵任至則文案山積數日迎

駕北

渡江就舟中判決晝夜不假寐者六日而積滯盡
清公扈蹕至江寧

上再賜御書一軸蟒裘羊酒傳 旨令逕歸署蘇

松舊積逋相仍有司不滿歲即呈誤去以故皆不
自愛而私規近利上官陰持其短索賂益急虧公
帑繫者累累公至則進州縣吏盡斥其所爲且曰
今與若更始苟稱職吾不吝薦引即不能以考成
罷歸猶得完身名守墳墓奈何日坐堂皇引前官
妻子對簿勘產反蹈若所爲皆頓首涕泣曰公活
我又誠司道郡守不得責屬吏餽金皆指天自誓
曰不敢於是除耗羨嚴私派清漕弊汰蠹役行保
甲革鹽商羨費一切皆以身先屏絕請託居數月

乃劾其貪暴尤甚者去之自制府將軍下皆轉相
戒不受所屬一錢奉使京朝官往來過客迅棹疾
去亭傳無斗粟之費吏治廓然大清公之陞辭也
上諭以積逋當以次漸理故公爲政先謀寬民力
興教化培植根本爲務嘗請改並徵積逋爲分年
帶徵免十八十九兩年災欠減賦額寬考成豁逃
丁調驛困免蘆課買銅除邳州版荒捐明萬歷朝
所加九釐餉聞有災傷弊政不問 廷議可否疏
立拜發亦恃

上之知其誠惻故見事無不爲所告無不盡也初

至報睢寧沐陽邳州災

上爲之蠲賦數千兩又報泰州災并永蠲前二年賦次年淮揚徐大水奏免賦十餘萬兩又盡免高郵寶應泰州興化鹽城等州縣賦復數十餘萬嗚呼

上之嘉惠於民至矣公所以將順而宣布之者豈非所爲主聖臣賢千載一時者歟公猶以救荒之法爲未盡乃發常平倉粟及丐將軍提鎮權關輸粟往賑又檄布政司以庫金五萬兩告糴江西湖廣或謂公宜先奏聞公曰吾君愛民必俟 旨往

糴民不滿中瘠乎遂遣兩同知行誠之曰若至極
言淮揚饑狀米斗一金令遠近聞之糴財及半運
還而大賈爭泛舟下江市中斗米直百錢而已後
歲熟償庫國帑無損而民所全活以億萬計有司
請報湖蕩蓮茭公駁還固以例請公曰例自人作
寬一分則民受一分之賜且蓮茭或不時熟一報
部即爲永額後欲去之可得乎禁遊冶驅優伶娼
伎嚴市肆淫辭邪說之流行刊布者禁有喪者無
得火化及久停柩者令下一歲報葬者三萬餘棺
五通神者祠廟遍江南巫射利誕妄士女怵於禍

福奔走如騫公取其像投湖中民始大駭已而妖
遂絕吳縣監生王某有奴竊貲逃出數年突引弓
刀二十騎自稱鬻身親王府詬罵索金錢公立擒
付獄論如律常熟縣奴某持其主父國初得隆武
劄迫主遠遁欲據有主婦公廉知大怒曰國家屢
更大赦此草昧時事何足問而逆奴以脅若主乎
追劄燔之斃之杖下廣立義倉社學聚民講孝經
小學月吉讀

上諭律令舊俗丕變而或勸公以講學者公謝曰
吾知盡吾職而已不知講學也又請爲公立書院

公曰吾不講學安有書院蓋公之學主於隨處體
認天理其要歸於自得而外貌夷然不自矜飾故
人非久相識者不知其嘗學道也其學於蘇門也
本崇姚江而不以先入之言為主故於濂洛關閩
之書尊信之尤篤余師孝昌先生著學統一編公
曰吾當拳拳服膺京邸與陸靈壽龍其談三日夜
心契其說與夫世之標宗旨樹藩籬以自炫鬻者
迥然異趨唯其一本於誠而已其樂閒靜甘澹泊
天性也居官不以絲毫擾于民夏從質肆中易夢
帳自蔽春野薺生日採取啖之脫粟羹豆與幕客

對飯下至臧獲皆怡然無怨色常州知府祖進朝有惠政嘗落職公疏留之進朝製衣韡欲奉公久之不敢言竟自服之舊蠲漕及地丁分年帶征權要以部費爲名前後索銀四十餘萬布政司屢以爲請且謂民樂輸公不可請之亟公怒將發其事吏叩頭謝久乃已大計籓臬託治裝遷延無行意公曰明日不行行劾汝矣不得已遂空手入都而他部每郡縣坐勒費至二三千金不止公見屬吏必霽顏色告以君恩不可負民命不可殘懇懇如家人語故其下皆畏而愛之以州縣爲親民官

愛民必恤吏立意培護是以爭自濯磨勉於爲善
公之文告坐而言可起而行使民易從不爲峭刻
過舉公勤於政事案牘紛煩必躬親裁決凡行過
公移數月後屬吏參謁面詢始末辨論明晰小有
遺忘命左右取原案繙閱虛公探索以求至當屬
吏人人感服不爲苟且塗飾以邀取名譽方整刷
未竟會 皇太子出閣

上諭吏部除授公禮部尚書管詹事府事至則立
召見問路所由及地方利病公以鳳陽災對

上遽遣學士往賑尋充經筵講官總裁明史每晨

東宮直講

皇太子賜坐稱以先生講畢出預廷

議居久之命與吏部尚書達哈塔日侍

皇太子

上所以倚任公者甚至然公在吳時已有不便公所爲者以爲形已之短而忌之而公將入朝時吳人欲攀轅留公公譬曉之曰

天子仁聖爾民疾苦如某事某事吾當入告爲爾蠲除忌者以公市恩百姓談議時政又淮揚開濬下河

天子遣大臣二人會督撫議衆欲停工公獨不可或勸公姑從衆論俟大臣入報

天子以公言口奏唯

聖明裁擇公不得已乃諾

大臣歸匿其辭不奏及公陞見

上問下河事具對本末大臣皆得罪以此舉朝側目公亦以久勞簿領精耗神疲殿幄起居動見扶摘部覆革職者再降調者一賴

上寬仁曲全僅鑄級而已公請養母求去不得又自惟奉職無狀久留不可闔門屏營席藁待罪每宣旨則涕泣叩頭請死

上聞之憫然爲之動容未幾遷工部尚書方受事而病不可爲矣

上遣御醫診視疾稍間奉 命詣潞河勘楠木感

風寒歸遂大困臨歿戒其子曰孟子言乍見孺子
入井汝輩須養此真心令時時發見久之全體渾
然可達天德若襲取于外終爲鄉愿無益也復以
聖恩未報毋養未終爲言挽子溥手指畫草遺疏
謝

上遂瞑

上聞遣學士多奇翁叔元賜奠茶酒命馳驛歸以
尚書禮祭葬公忠孝廉潔出於天性臨事制義充
之學問平時見爲迂闊而當幾磊磊立斷馭下凜

不可以私干而所在務寬小過撫吳時蘇有高士
徐枋居西山四十年不入城公屏騶從步行造門
枋終不肯見公歎息而去時議兩高之其聞召
將去吳也百姓啼號罷市十餘日投匭斂錢謀叩
闕不得則老幼提攜奔送自吳門至江北千里不
絕於道其歿也無知不知皆哭曰正人死矣人謂
公撫吳廉直似海忠介而去其煩苛精敏似周文
襄而加之方正至其所學純粹有體有用蘊之而
爲道德發之而爲事業而人尤惜其用之猶未盡
者則有非二公之所得而與者矣其家居室無廣

厦侍無姬媵日以讀書養親爲事所著有洛學編
二卷補睢州志二卷詩文二百餘篇公移條約十
餘卷藏於家享年五十有九元配馬氏封恭人子
四人溥濬沆準女三皆適士族銘曰

惟湯於世寬始祖遇明之興奮厥武積功神電衛
百戶孫襲千戶其諱庠自滁來遷家睢陽易守岷
衛祖烈光六傳希范趙城丞子敏孫契州諸生三
世棄武名一經尚書生也爲國器性耽典籍弱不
戲學播仁種耨以義朝出蓬山暮華陰遺愛衍溢
留虔南華山高高貢水深歸樓子舍矢不出再返

玉堂詎意必掌

帝絲綸預機密

帝憂南顧予汝賢公出整頓未兩年民蒸俗熙吏
恪虔

帝曰汝歸司冑教彼夫已氏豈同調域含狙伺術
已巧事有變遷理則那

主恩前後無偏頗千載視此石嗟哉

誥封奉直大夫翰林院侍讀學士待贈禮
部右侍郎顧先生神道碑銘

吾鄉封學士雪嶺顧先生之卒也與其母太夫人

同日太夫人病先生焦憂盡悴比疾革方夜鄉晨去冠扱衽徒跣哭不絕聲及視含斂交手哭聲漸微謂家人曰吾殆將死矣復號慟遂絕於乎先生固死於毀也禮曰毀不危身又曰五十不致毀六十不毀七十惟衰麻在身飲酒食肉處於內古者不以死傷生故諄諄乎言之先生年近七十節損哀踊以禮自制宜也先王之制禮也賢者俯而就之不肖者跂而及焉先生之賢毋乃過於禮與余謂從來忠臣孝子當其至性感發捐軀絕命而不之顧非有所彊勉而爲之發於中心行乎不得不

然如是而已矣。今人不講於喪禮也久矣。庶見素冠庶見素韞。詩人譏之。其在於今。吾吳俗爲尤甚。君子風世厲俗。寧爲過毋爲不及爾矣。矧過非聖人所禁也。子路曰。吾聞諸夫子。喪禮與其哀不足而禮有餘也。不若禮不足而哀有餘也。魯襄公三十一年夏六月。公薨。秋九月。子野卒。傳曰。毀也。夫子書之。有美辭焉。此其徵矣。子臯之泣血三年。未嘗見齒。斯亦禮之過者。君子以爲難。曾子責子夏之喪明。以喪親無聞爲其罪。使子夏喪其親而喪其明也。曾子不責之罪。可知矣。執親之喪。創鉅痛深。

死則死爾惡乎禁諸先生與余少同學相知為深
其後侍郎貴與余同朝又相善也比葬侍郎以墓
上之石請銘余作而歎曰先生非僅行事應銘即
其死固宜書而揭之為世矜式也其何辭先生諱
天朗字開一號雪媚世為吳人明初有以軍功官
錦衣千戶者居北平先生祖應奎生三子季曰純
明猶襲錦衣職入國朝封昭毅將軍為順天人
是為北宗仲曰謾明太學生仍居吳是為南宗先
生考也太學娶某氏即先生母太夫人也生二子
先生為伯甫童外則見端坐長彌謹重目不左右

顧爲邑庠生曹試輒拔萃名聲垂延順治丙戌試棘院長洲令田君得卷首薦以爲當元與某推官爭不得遂忿然作色曰寧已之乃落副榜既而田亦自悔自此蹭蹬益無所遇庚子至京師選入官學教習勳舊子弟已酉復試北闈儕流皆先後掇第視同試皆邈然少年先生益不自得會長子侍郎領薦愾然曰吾乃今可以休矣蓋自先生爲諸生至是凡十踏舉場丁酉癸卯闈藝俱呈薦卒被格主司先生自幼績學工文辭務自刻削立節槩一時名人魁士皆詣門請交揭德振華爲流輩慕

尚余兄弟與吳中名士少日爲文酒之會先生皆與焉然先生器局凝重不妄交游獨與余輩三數人尤相結先生篤於內行羣從子姓勸飭指誨竭盡誠款家門雍穆雖僕隸下人居恒不加訶叱迨侍郎累踐華要臻卿貳杜門甘澹素不異舊常不涉非分纖芥宦吳者輒歎先生家範之謹三舉鄉飲大賓所編集有易春秋三禮諸說所有詩文集各若干卷藏於家初封翰林院編脩晉封奉直大夫右春坊右諭德兼翰林院脩撰晉封翰林院侍讀學士生以天啓四年甲子歿于康熙二十九年

庚午以某年月日葬于某鄉之某阡配陶氏初封
安人晉封宜人子五汧癸丑進士禮部右侍郎兼
翰林院學士沆例監生溥戊午副榜貢生官學教
習宏庠生澧幼孫四楷仁丁卯順天舉人植義太
學生侍郎出乘智溥出柁讓宏出曾孫一文煥捐
仁出女三孫女五曾孫女三先是侍郎與余同倅
直數言我親老欲乞假省覲先生家書屢止之以
為幸年未耄侍堂上無恙不宜廢公顧私辜重眷
余之請告也侍郎過余曰一月後請急歸矣余出
國門侍郎先與諸公集餞郊外塗遇侍郎自都亭

入方以祖母訃趨還邸中余遣人唁之則曰吾憂我父至性不勝喪也明日而先生訃亦至矣一時議禮者謂侍郎應否承重余考賀循喪服云父死未殯而祖父死服祖以周既殯而祖父死三年父未殯服祖以周者父尸尚在人子之義未可以代重也虞喜則云三禮無有此條殆是脫失祖父正統非爲旁親若父死未殯服祖但周則祖無倚廬傳重在誰由此推之受重者服亦重賀循之言爲未審也喪服傳父卒然後爲祖後者服斬今制祖母承重與祖同太夫人捐養既小斂未成服而先

生卒侍郎以適孫爲祖母後其何能不重侍郎熟
習掌故其居廬也有事于太夫人几筵曰承重孫
有事于先生曰孤子合禮意矣銘曰

目公和光而獨揭揭謂公介特而不劇割罔嫌於
嗇罔盈於豐削類砥光不繫其逢禮廢權制淪胥
日流曾不禽若躑躅啁啾雞斯徒跣隕於一哀疇
顧有涯弗申無涯性至行難人苟欲繩曷考聖謨
載徵斯銘

太常寺少卿高君神道碑

康熙二十九年四月辛巳中憲大夫太常寺少卿

高君卒于位九月君之喪歸自京師次年四月祔
葬松江府城南五十里之張堰贈通政先府君之
兆孤騫具狀請爲隧道之文君嘗問業於余余爲
一統志總裁官實舉君共事余不得辭爲詮次其
始終序曰君諱層雲字二鮑號謬苑晚更號孤邨
先世自宋南渡居上海既遷華亭四傳至贈翰林
院檢討諱年於君爲曾祖萬厯乙未進士翰林院
檢討諱承祚於君爲祖崇禎丙子鄉試副榜貢士
諱秉藻君之父也君既貴貢士君得贈如子官太
夫人金氏楊氏皆贈恭人君少時前後母及貢士

君連喪居堊室日久哀悴中負土營葬既畢事而
家日貧貢士君在時故以隱阨守志又不欲君治
舉子業而時所重皆場屋文字苟且塗飾耳目者
君獨刻意爲詩古文詞益貧不自聊又迫賦役坎
壈失次遂策蹇驢入京師

天子方幸學釋奠君泚筆作臨雍賦見稱于時未
幾由秦入蜀歷關河棧閣之路留蜀二年策滇黔
必亂勢將及兩川乃亟歸放船濫潯浮江而下抵
家而吳三桂反川塗梗塞人咸服其先見康熙十
四年乙卯再至京或勸君習舉子業君曰是不難

鍵戶百日遂領京兆薦明年成進士故事進士釋
褐待銓者例得分校鄉試戊午遂與是選又二年
授大理寺左評事甲子典廣西鄉試還朝充一統
志纂脩官是時君官廷評六年矣意所平反或與
卿貳不合必力爭之或不得則爲兩議以上輒如
君議

天子察知君可用因考選親試乾清門稱旨授
吏科給事中遇事敢言尤務持大體二十六年正
月二十五日

文皇后上賓有詔諸王大臣集議喪禮永康左門

外諸親王郡王貝勒貝子公等以次環坐內閣九卿科道同詳議畢閣臣向前白其議從諸王長跪移時武定李公年最老起即踣地君銳然曰是非國體即日抗章彈奏謂天潢貴裔大臣禮當致敬獨集議國政異時無弗列坐所以重君命尊朝廷況永康左門乃禁門重地

大行太皇太后在殯

至尊居廬天威咫尺非大臣致敬諸王之地大學士爲輔弼大臣固當自重諸王亦宜加以禮接不可驕恣倨慢坐受其跪失藩臣體書奏舉朝皆頸

縮

天子用君言下宗人府吏禮二部議後凡會議時大臣見諸王不得引身長跪著爲令又糾正黃旗漢軍都統張所知用君言降調由是衆皆畏憚是年夏五月有事於俄羅斯國擇遣臺省漢官二人隨大軍往方廷議時同列並抑首伏氣不敢復前君慷慨請行事雖不果舉朝偉之六月京師亢旱勅議應行應革事宜於時江淮間方行屯田事民大擾君請急停以蘇百姓大臣主其議

上嘉納之遷通政司右參議即日轉左未一年又

遷今職君於郊丘廟享諸典禮無不明習其令式
時

上憂旱甚社稷山川之祀祈禱無虛日君黎明赴
壇虔共即事雖流汗浹體竟日不見惰容以此益
受

上知而精力漸憊矣亡何病作甫五日遽卒

上臨朝歎息年五十有七衆皆惜君不究其用也
君爲人倣儻瑰瑋好大節不爲姘姘細謹在班行
中進止有儀人皆目屬之博覽強記爲詩文痛嫉
俗學之陋追古作者有改蟲齋集若干卷工書及

画善賞鑒平居簾閣據几圖史古玩雜陳意灑然
自得持縑素請者率滿意以去曾以書屢被 御
獎在太常時

上嘗諭卿席爾達曰爾衙門政事頗簡可語高層
雲留意書體嗚呼君之結知

主上者雖不在一材一藝而人以是卜

上之屬意用君矣君性豪邁不問家有無有輒散
盡不侍餘身沒妻子幾不能自存配吳氏明戶部
主事諱嘉胤之孫女子三人長即騫次駕次馭女
一人孫男女各一人高氏自檢討公來本貴盛遭

時鼎革家中落君以布衣走輦下十餘年間連舉
順天禮部兩試位至卿寺文學節概聞天下雖將
用復蹶抑可謂難也已銘曰

彼美一人申浦之濱奮自孤特卓爾不羣力學嗜
古負氣懷奇連蹇乃通豈曰莫知諫垣抗論大著
直聲骨鯁者奮便媚以驚一歲再遷恩顧日渥納
言靖共秩祀儼恪

帝簡厥心將授事樞未究其施中道云徂鬱乎松
阡君昔手築先公在焉窆附宰木宛宛彼邱壘壘
其石著德與功昭示靡極

內閣學士兼禮部侍郎孫公神道碑銘

嗚呼是爲我友內閣學士禮部侍郎德清孫公之墓公年少登朝荷

聖主眷遇居則侍奉螭陛出則陪扈鑾輿獻納論思渥蒙 睿賞既銜命治河相度疏濬將次第成功而朝議停罷公左官仍居翰林

天子念講幄舊勞旋授內閣學士踰月以疾卒官奏聞

上臨軒太息賜祭葬如禮余與公同擢第同官翰林記注起居同被命教習常吉誼若兄弟公之

撤瑟也召余屬以後事口占遺疏俾余書之余悲
不自勝輒翼未行余與諸同年生數往哭焉今窀
穸有期介弟在中與孤子見行輩具狀請銘其隧
道之石余敢辭按狀公諱在豐字屹瞻湖州德清
人孫氏遠有傳緒來遷自八世祖永昌始居歸安
之菱湖里祖考諱懋果邑庠生祖妣施氏父名煇
郡庠生妣沈氏繼妣吳氏及公貴累封父贈祖皆
內閣學士兼禮部侍郎累贈妣贈祖妣皆淑人公
充頤廣顙清姿玉立甫韶稚嶷然如成人年十六
補博士弟子員登癸卯浙江賢書越七年中庚戌

南宮試殿試一甲第二 賜進士及第授國史院

編脩本年充日講 起居注官壬子順天武鄉試

主考尋陞侍講癸丑會試同考轉侍讀又陞侍講

學士轉侍讀學士子假歸省旋遭太夫人喪服闋

補原官擢內閣學士兼禮部侍郎遷翰林院掌院

學士充 經筵講官教習壬戌乙丑兩科庶吉士

主壬戌武會試乙丑會試既遷工部右侍郎以總

裁

太祖實錄告成加秩支正二品俸奉 命監脩下

河逾年轉本部左侍郎以河工議與在事者不合

撤歸降補翰林院侍讀學士旋除內閣學士兼禮部侍郎卒于位公爲講官最久每講畢舉經書粹義參以己意凡有關治道足爲黼座獻納者敷陳御前從容剴切移時方退

上常動容嘉歎其他造膝之言多所啓沃不盡記五鼓趨朝晡時還邸日以爲常

天子念淮揚鹽城興化諸縣當河下衝民苦昏墊慨然欲疏洩脩治之公受命夙駕疾馳晝夜閱畛泥行露宿不遑啓處凡地勢高下施工次第犁然於心乃條奏請行之詔報可於是岡門白駒

丁溪草堰諸工先後庀事畚鍤雲興百役受功岡
門工先成餘工亦綜治過半廷議遽撤公歸然公
固已功高心苦公夙負文名三主鄉會文武試兩
掌教習所甄拔造就皆一時俊髦公生當 盛世
天子右文重儒所以眷注公者甚至其爲編脩也
與庶吉士同館課肄未散館例無擢領他職者獨
公即充日講 起居注官其爲侍講也領日講如
初講官八人以次倅直

上獨命公與掌院孝感熊公常直熊公入內閣舍
弟與澤州陳公文敏葉公繼之皆與公同進講不

在倬直之列其即吉赴闕也故事詞林自宮僚

以上有定員公需次侍講學士亡缺

上特命公就職即日侍起居不限常額詞臣出

貳六卿非吏禮二部不得兼翰林銜

上特命公兼翰林院學士即其左遷之日應授散僚

上獨令居翰林皆異數也公具才敏贍每應制賦詩援毫立成嘗扈蹕遊南苑翼圍之內有麀鋌走上目公以御用弓矢授公射公射得麀遂以

賜公顧謂諸大臣曰孫在豐文武材也廷試武

進士

上復命公射射連中

上大悅語侍衛是固曩日射麋者也壬戌

上以滇黔蕩平謁告 山陵公扈從遠出關塞過

松花江載筆紀述時時被命有所撰著立就甲子

冬

上幸闕里釋奠畢 命孔氏子孫講書擬進講章

命公改定

上坐行宮令侍衛倚待夜半進呈

上披覽喜曰此方是講義體又扈從南巡車駕至

蘇州

上語內大臣孫在豐家湖州去此不遠可一往省
親時公不離 清蹕承顧問跂望庭幃咫尺猶不
敢奏請及奉 旨感激涕泣瀕行復奉 諭汝來
不必至江寧第於淮揚誼行在其金陵名勝有應
留名處汝係從官必為爾題名也公歸省居二日
疾馳從 駕還前後 賜兼金文綺貂裘披領鞍
馬珍饌非一蒙被知遇錫予便蕃出廷臣石下河
一役出自

聖慮公以親信特命董率徒以漕河兩臣持論不

相下朝議紛紜遂有齟齬公者然

上意猶念公前勞令復居禁近公自度與時左趨危疑艱艱又以兩年督視畚鍤辛苦特甚未久疾作矣嗚呼公持身慎密居官勤敏加之

上所親近寵遇非常宜無所得過乃猶不免悄憂顧慮盡瘁殞身詎不重可慨邪公孝友醇謹出自天性丙辰歲循俸當陞學士聞繼母病急請省視弟在中善屬文撫愛倍至與人交必以情里黨戚友賴周卹者甚衆所著明史諸帝紀及制誥諸代言之文副在史館他如周易尚書四書通鑑講義

扈從筆記東巡日記下河集思錄尊道堂詩文各若干卷藏於家公生以順治甲申歿於康熙己巳享年四十有六以某年月日葬陽山賜阡配吳氏贈淑人先公卒子五篤行見竹學行參行載行篤行早亡銘曰

恩數匪替賁於重泉鬱乎陽山孫公賜阡公在左右御席輒前屢頷

帝頤嘉言勿宣遠陪豹尾密侍細氈惟帝明明識公才賢自公之出拙於拘攣知有明詔其直如弦曾不度思與誰周旋三言不疑未塞悃悃非

帝念勲終始曷全河流安安洪水爲川道噴奠溢
汙來成田惟 帝之畫瘡痛思蠲厥績有緒
帝命是虔公歸不復紆策嗇年屹屹豐碑銘詩不
鐫

憺園文集卷第三十一